

**DIN MAR ADIERI MAR**

**ALLAH**

**ISLAM**

**Sheikh Omar Otieno Al-Bashir**

**Surah Al-Anaam, Verse 125:**

فَمَنْ يُرِدِ اللَّهُ أَنْ يَهْدِيَهُ يَشْرَحْ صَدْرَهُ لِلْإِسْلَامِ وَمَنْ يُرِدْ أَنْ يُضِلَّهُ يَجْعَلْ  
صَدْرَهُ ضَيِّقًا حَرَجًا كَأَنَّمَا يَصَّعَّدُ فِي السَّمَاءِ كَذَلِكَ يَجْعَلُ اللَّهُ الرِّجْسَ عَلَى  
الَّذِينَ لَا يُؤْمِنُونَ

**’Omiyo jalno ma Ruoth Nyasaye dwaro mondo otelne eyoo moriere mar warruok, oyaone [kore] chunye mondo oyie gi Islam, to jal ma odwaro mondo owe olal, oketo chunye bedo mapek kendo madiny mana kang’at maidho got mochung’ tiir. Kamano ekaka Ruoth Nyasaye njao chunje jogo mokwedo yie kendo ong’anyo.’**

## **WECHE MOTELO**

**Ng'ato ka ng'ato inyuolo e aluora ma en owuon ok oyiero. Din mar anyuola mare kata din mar piny owacho ichuno e pache gi winjo mare chakre odonjie e piny ka. Eseche ma osebedo rawera yudo ka oselok pache ma ong'eyo mana ni gik mane oyudo ka jonyuolne gi jothurgi lamo e gik ma adieri. To kata kamano ka osetegno ma pache obedo maliu kendo okikore gi oganda moko to gi jopinje moko mopogore kendo man gi paro gi yie mopogore, gichako penjore ni to gik ma wamakogi be gin gik ma adieri? Ka ochopo kanyo to jogo ma manyo adiera seche moko chopo kama wigi kikore ma tamgi nono ni to ka ng'ato ka ng'ato lieko ni yie mare ema ber, paro mare ema ber, lony mare ema ber kendo din mare ema ber ma onego dhano omaki kendo oluw. Ka iwacho adier, gin duto gijiwo ji mondo ji otim ber. Koro kare ere maber? Ok ginyal bedo ni gin kare te nekech moro ka moro lieko ni nyawadgi obanyong'. Ka en kama to kare ere kaka jal madwaro yorno moriere diyud yoo?**

**Ruoth Nyasaye ne omiyowa paro to gi riekko matut mondo omi wang'ad paro ma kare ewi wach ni. En e wach mapek miwuoro engima dhano . Ngimane manyime otenore gi paro mong'adono. Kuom mano ng'ato ka ng'ato nyaka ng'i wachni maliu ahinya, nonro mantie kendo oyier gimanenore nekech gadiera nyaka chieng' moro adiera moro chak nyiedhre elela. Mana kaka dinde gi lony mamoko bende lieko ni gin ema gin gi adiera, Islam bende oramo mana ni en ema en din madieri enyim Ruoth Nyasaye achiel kende ma wuon polo gi piny. Nyaka kanyo Islam onge pogruok gi dinde mamoko. Bugni keloni ayanga maliu kuom adiera mar wach. Kamano nyaka ng'ato ket e pache ni ok inyal yango adiera mag wehegi mak mana ka ng'ato oyiengo bathe paro moko mag akweda ma ng'enyne geng'o wengewa mondo kik wayang ratiro. Ka watimo kama to eka wanyalo tiyo gi riekowa mane Ruoth Nyasaye omiyowa mondo watimgo yiero modimbore kendo mar adieri.**

**Nitie paro moko ma inyalo chungu motegno ma ger ayanga kendo adieri mar Islam ni en e din ma ratiro mar Ruoth Nyasaye. Edek ma ong'ere ayanga gin kaka:-**

- 1. Kaka nying mar dinni oyudore to gi tut mar tiend nyinge no.**
- 2. Yot mar winjo mag puonj mage man kar kende maonge mipimogo kuom wa mantie ekind Ruoth Nyasaye, dhano to gi chuech mage.**
- 3. Bedo ni Islam en din ma oganda jokadhano oyiego e piny ngima eseche duto. Magi e gigo ma donjo e paro gi obuongo mamiyo din bedo din ma adieri mar Ruoth Nyasaye. Wabiro gedo ewi weche adekgi malach mondo iwinj matul.**

## NYING DIN .

Gimokuongo ma ng'ato nyaka ng'ee maler ewi din mar Islam en tiend Islam onogo motelo. Islam en dho Jo Arabu ma tiende ni: bolruok enyim Ruoth Nyasaye achiel kende, ma ong'ere gi dho Jo Arabu ni Allah.

Jagono ma obolare enyim Ruoth Nyasaye achiel kende iluonge ni Ja Islam. Din mar Islam ok oyudo nyinge kuwuok kuom nying ngato kata nyinge ji. To bende ne ok obedne piny ka iyierone nying gi ji bang' jok mosekadho kaka din mar Jo Kristo bang' Yesu ma wuod Maryam (*kwee mar Ruoth Nyasaye ochopne*) din mar Jo Buddha bang' Gautama Buddha. Din mar Konfusia bang' Confucius, Din mar Marxism bang' Karl Marx. Din Jo Joyahudi bang' dhood Juda to gi Din Jo Hindu bang' Jo Wahindi. Islam ma en bolruok enyim Ruoth Nyasaye achiel kende e din mane omi kwarwa Adam (*kwee mar Ruoth Nyasaye ochopne*), dhano mokuongo kendo Janabi mokuongo mar Ruoth Nyasaye. Kendo en e dind Joote duto mane Ruoth Nyasaye ooro ne dhano. Nyinge ne Ruoth Nyasaye owalo ma omiyowa kendo otalo ei fweny mogik mane omiyo dhano. Ei fwenyino miluongo ni Quran, Ruoth Nyasaye wacho kama:-

الْيَوْمَ أَكْمَلْتُ لَكُمْ دِينَكُمْ وَأَتْمَمْتُ عَلَيْكُمْ نِعْمَتِي وَرَضِيْتُ لَكُمُ الْإِسْلَامَ  
دِينًا .....

Kawuono asetiekonu din maru, kendo asedhialonu ng'uono maga, kendo aseyeronu Islam mondo obed din maru. .... Surah Al-Maeda, wes mar 3

وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ وَهُوَ فِي الْآخِرَةِ مِنَ الْخَاسِرِينَ

To Jagono madwaro din mopogore gi Islam ok noyiene, kendo chieng' giko obirobedo achiel kuom jogo moyudo lal.....Surah Aali-Imran, wes mar 85:

Kamano Islam ok en Din manyien ewang' pinyka ma okel gi Jaote Mohamed ( kwee gi lamo mar Ruoth Nyasaye ochopne ) e piny mar Arabu bang' higni 700 bang' Kristo, mak mana ni Jaote (*kwee gi lamo mar Ruoth Nyasaye ochopne*) ne obiro lero maliu ma owinjore ne oganda to ndalo mang'eny mosekadho ni en e Din maratiro mar Ruoth Nyasaye, Allah mana kaka ne ofuenyne Janabi Adam (*kwee mar Ruoth Nyasaye ochopne*) to gi Jonabi mane oluwo bang'gi.

E okang'ni, abiro taloe dinde ariyo ma bende oramo ni gin a dinde mag adieri moa kuom Ruoth Nyasaye achiel kachiel. Onge kamoro amora ei Muma Maler ma Ruoth Nyasaye ofuenyone Jaote Musa (*kwee mar Ruoth Nyasaye ochopne*) gi nyikwaagi ni koro din maru en din mar Juda, kata jogo mane oluwo Jaote Yesu (*kwee mar Ruoth Nyasaye ochopne*) ni din margi koro en din mar Kristo. Eyoo machuok, din mar Jo yahudi to gi Jo Kristo ne ok gin gik mofueny gi Ruoth Nyasaye kendo ne ok oyangogi. Nying mar dind Jo Kristo ne oyudore mana bang' ka Jaote Yesu wuod Maryam (*kwee mar Ruoth Nyasaye ochopne*) osewuok ewang' piny ka.

Koro, kare Jaote Yesu (*kwee mar Ruoth Nyasaye ochopne*) ne en jadin mane mopogore gi nyinge kuom adiera? Nyinge ariyo mag Yesu magin "Yesu" to gi "Kristo " gin dho Jo Hibrania, kokadho kuom dho Greek to gi dho Latin. Gi dho Grik iluonge ni **IESOUS** ma ka iloko gi dho Hibrania to iluongo ni **Yeshua** kata **Yehoshua** (**Joshua**). Kristos ma en dho jo Grik tiendeni **Mesia** gi dho Jo Hibrania, ma en singo ewi Jaote Yesu tiende ni jalno mowal kendo owir gi moo mondo obed jatich Ruoth Nyasaye. Omiyo din mare nyaka yudre mana ei puonj mage mane opuonjo e ndalone, mane ojiwo jopuonjrene gi jolupne mondo omaki motegno obed negi ogayi e ngimagi pile pile ekindgi gi Ruoth Nyasaye. Ei Islam, Yesu (*kwee mar Ruoth Nyasaye ochopne*) en Jaote Nyasaye mane ooro .

Nyinge gi dho Arabu iluongo ni Issa. Mana kaka Joote mane obedo kapok obiro, ne opuonjo joge ni mondo obolre enyim Ruoth Nyasaye ( ma e nonro mar Islam). Ka ing'iyo e Muma Manyien ibiro yudo ka Jaote Yesu (*kwee mar Ruoth Nyasaye ochopne*) ne opuonjo joge ni:-

" Wuonwa man e polo malo, Nyingi mondo omi duong'. Dwaroni otimere e pinyka kaka timore e polo malo" (Luka 11:2 to gi Mathayo 6:9-10)

Ratiro ni ne Jaote Yesu onuoyo ma ng'eny ahinya kuonde ma opogore opogore ei Muma mar Singruok Manyien. Kuom ranyisi, ne opuonjo ni jogo ma obolore emanoyud ngima mochwere ma nyaka chieng' . Yesu (*kwee mar Ruoth Nyasaye ochopne*) owuon bende onyiso ni en bende obolore enyim Ruoth Nyasaye achiel kende.

" Ok jogo mabiro luonga ni Ruoth, Ruoth, enodonj ei piny Ruodh Polo, mak mana jogo matimo dwaro mar wuonwa mantie e polo malo. (Mathayo 7:21)

" Ok anyal timo gimoro amora kuom chikna awuon. Ang'ado bura mana kaka ochika kendo ang'ado gi ratiro nekech ok en dwaro mara to mak mana ni en dwaro mar jalno mane oora. " (Johana 5:30)

Nitie ripode mang'eny ei injili mane Jaote Yesu (*kwee mar Ruoth Nyasaye ochopne*) oleroe ni en ok en Ruoth Nyasaye. Kuom ranyisi seche ma opuonjo ndalo mag giko, ne owacho ni:-

" Onge ng'at ma ong'eyo saa kata odiochieng'. Ok kata Malaika, ok wuowi mak mana wuoro kende." (Mariko 13:32)

Omiyo Yesu (*kwee mar Ruoth Nyasaye ochopne*) mana kaka Joote mane obiro motelone to gi ma obiro bang'e, ne opuonjo mana din mar Islam ma en bolruok enyim Ruoth Nyasaye achiel kende.

## RUOTH NYASAYE TO GI CHUECH MAGE.

Nekech bolruok enyim Ruoth Nyasaye achiel kende en achiel kuom yore mag lamo Nyasaye, ote maduong' mar din mar Islam en lamo Ruoth Nyasaye achiel kende gi ratiro. Odwaro kendo ni mondo ng'ato owe alam duto mag lamo nyiseche manono kata dhano wadgi. Ma en nekech gik moko duto tee gin chuech Ruoth Nyasaye. Wanyalo wacho ni Islam luongo dhano e lamo Ruoth Nyasaye ma Ja Chuech. En ema owinjore olame gadieri, nekech kuom yie mare eka alam duto oduoko ka otimone jal ma kwaye gino ma okwaye.

Kamano ka dhano olamo yien, kaeto otimore kaka odwaro, ok en yienno ema oduoko lembe ma omiyo dwaro mane olemone olosore to mak mana ni Ruoth Nyasaye achiel kende ema oduoko lembe. Ng'at ma ong'eyo yore mag Nyasaye biro wacho ni mano ekaka en pile to jal ma lamo yien to ong'eyo ni yiendeno ema oduoko lembe. Emomiyo alam ma okwago Yesu, Buddha, kata Krishna kata Kristofa Maler, kata Juda Maler kata mana Mohamed (*kwee mar Ruoth Nyasaye obed kuome*) ok dwok gi jogo. Ruoth Nyasaye ema dwokogi. Yesu ne ok onyiso jolupne mondo olame. Ne onyisogi mondo gilam Ruoth Nyasaye achiel kende mana kaka Quran wacho ni :-

وَإِذْ قَالَ اللَّهُ يَا عِيسَى ابْنَ مَرْيَمَ أَلَمْ أَنْتَ لِلنَّاسِ اتَّخِذُونِي وَأُمِّي إِلَهَيْنِ مِنْ دُونِ اللَّهِ قَالَ سُبْحَانَكَ مَا يَكُونُ لِي أَنْ أَقُولَ مَا لَيْسَ لِي بِحَقِّ إِنْ كُنْتُ قَائِلُهُ فَقَدْ عَلِمْتَهُ تَعَلَّمَ مَا فِي نَفْسِي وَلَا أَعْلَمُ مَا فِي نَفْسِكَ إِنَّكَ أَنْتَ عَلَّامُ الْغُيُوبِ

“ Eka Ruoth Nyasaye biro wacho: Oh Yesu wuod Maryam, in ema inyisojii mondo olami kachiel gi minu kar lamo Ruoth Nyasaye? Eka nowachi ni: Duong' odogni. Aonge ratiro mar wacho weche maok owinjore awachi. Ka dine bed ni awachogi to dine ing'eyo. Ing'eyo mago manie e pacha to an ok ang'eyo manie e pachi. Chutho in e Jang'eyo mag gigo maling'ling'.” Surah Al-Maeda, wes mar 116:



**To Yesu bende ne ok olamo ne en owuon seche mane olemo. Ne olemo kochomo alam mare ir Ruoth Nyasaye achiel kende. Ei injili, liekore ni :-**

**"Ondiki ni, lam Ruoth Nyasachi achiel kende kendo en kende ema itiine". (Luka 4:8)**

**Wachni bende inyalobiro yudo e chakruok mar Quran ma bende iluongo ni Sura mar Gonyruok.**

إِيَّاكَ نَعْبُدُ وَإِيَّاكَ نَسْتَعِينُ

**“In kendi ema walami kendo in kendi ema wakwayo konyruok duto kuomi”. Surah Al-Fatiha, wes mar 5.**

**Ondiki kamachielo e Singruok mogik ma en Quran kama:**

وَقَالَ رَبُّكُمْ ادْعُونِي أَسْتَجِبْ لَكُمْ إِنَّ الَّذِينَ يَسْتَكْبِرُونَ عَنْ عِبَادَتِي سَيَدْخُلُونَ جَهَنَّمَ دَاخِرِينَ

**Ruoth Nyasachu wacho ni: “luongauru to a biro yieneu ( abiro duokou e leembu) . Chutho jogo ma nigi sunga maok dwar lama nodonj ei mach mochwere.” Surah Ghafir, wes mar 60.**

En gimaduong' kendo ma nyaka mak motegno ni ote maduong' mar din mar Islam ma en lamo Ruoth Nyasaye achiel kende, bende ler adimba ni Ruoth Nyasaye to gi chuech mage gin gik moko ariyo mopogore ahinya. Ruoth Nyasaye ok chal gi chuech mage to bende ok giromre eyo moro amora. Ma nyalo nenore ni en gimawinjore nyalodia to king'iyie maber to yudore ni dhano seche molamo chuech Ruoth Nyasaye to oweyo alam ma kende mar Ruoth Nyasaye, otimo ma kuom fuwo gi ng'anyo ne ratiro mare ewi Ruodhe. En yie mar ji mang'eny ni lich mar Ruoth Nyasaye nitie kamoro amora kuom chuech mare kendo duong' mare e kinde moko ne nitie kuom chiechne. Ma emomiyo jomoko neno ni lamo chuech mar Nyasaye kaka yien, Yesu, Buddha, kata Krishna en gima owinjore otim nekech duong' mar Ruoth Nyasaye nitie eigi. Ma en oyuma maduong' miwuoro kendo lal matamre gi nono. Kuom mano ote mar Islam kaka okel gi Jonabi mag Ruoth Nyasaye, en ni nyaka walam Nyasaye achiel kende kendo kik walam gimoro amora machielo mopogore.

**Quran lero kama :-**

وَلَقَدْ بَعَثْنَا فِي كُلِّ أُمَّةٍ رَسُولًا أَنِ اعْبُدُوا اللَّهَ وَاجْتَنِبُوا الطَّاغُوتَ فَمِنْهُمْ مَّنْ هَدَى اللَّهُ وَمِنْهُمْ مَّنْ حَقَّتْ عَلَيْهِ الضَّلَالَةُ فَسِيرُوا فِي الْأَرْضِ فَانظُرُوا كَيْفَ كَانَ عَاقِبَةُ الْمُكذِبِينَ

**Kendo oganda koganda [ oganda dhano] ne waoronegi Jaote ma wacho ni : Lam uru Ruoth Nyasaye achiel kende kendo kwed uru Jachien. Omiyo noyudore eigi jogo mane Ruoth Nyasaye owaro, to gi mago mane lal ochomo tir. Omiyo wuothie ewang' piny mondo inee kaka jomong'anyo gikogi ne chalo.” Surah An-Nahl, wes mar 36.**

Seche ma openj jolam nyiseche mopaa kendo molosi gi lweti dhano ni to en ang'o momiyu gilamogi? Duoko mantie e lewgi machiegni enni ok walamgi, mak mana ni walamo Nyasaye mantie eigi. Giwacho ni gitiyo gi sanamugo ka giketo pachgi matut mondo gichop ir Nyasaye. Jal moro amora ma oyie gi paroni oknee badhruok mantie eyie. To jalno, malamo Ruoth Nyasaye achiel kende to ok nyal yie mibadhi machalo kama kata bed ni owire gi moo machalo nade.

Jogo ma osebedo ka lamo nyiseche adek ( **Nyasaye Wuoro, Nyasaye Wuowi to gi Nyasaye Roho Maler**) osetimo kamano kagiwacho ni Nyasaye nitie ei dhano. Gimedo miriambo maduong' miwuoro ni Nyasaye nitie eigi maloyo oganda mamoko, kendo gisiro wachno kagiwacho ni ji duto nyaka lam mana kaka gi lamo. Bang' higni mang'eny ka nyisechegigo osetho pod otamogi kaka giyudi lokruok mar paro nekech paro mane gipidho echunyi kuom higni mang'eny en miriambo ma ok donj ei obuongo.

Nyaka sani koro oseyangore maler ni jalno mosemako ote motegno mar Islam ok nyal lamo dhano wadgi kata sanamu kata bed mana ni ochune mathoo ema oneeno. Ote motegno mar Islam luongo dhano mondo olam Ruoth Nyasaye achiel kende, ka gikwedo lamo chuech gi yore tee. Ma e tiend siro mokwongo mar Islam :-

**LAA ILAAHA ILLA ALLAH ( Onge nyasaye moro amora mowinjore olam gi ratiro mak mana Ruoth Nyasaye achiel kende Allah, Kendo Mohamed en Jaotene kendp Jatiche)**

Ma e wach mamiyo ng'ato bedo Ja Islam. Ka osingore ni Ruoth Nyasaye en achiel kende mowinjore olam gi ratiro kendo oyie gi ote mar Jaote Mohamed ( **kwee mar Ruoth Nyasaye ochopne** ) Yie kuom wachni gi chunyi duto miyo ng'ato donjo ei ngima mochwere ma nyaka chieng'. Ma Emomiyo Jaote mogik, Mohamed ( **kwee mar Ruoth Nyasaye obed kuome** ) owacho kama:-

“ Ng'ato ang'ata mowacho ni onge nyasaye moro amora mowinjore olam gi ratiro mak mana Ruoth Nyasaye achiel kende nodonj ei polo”. Yie kuom sironi dwaro ni mondo ng'ato obolare ahinya enyim Nyasaye mana kaka opuonj gi Jaote Mohamed (*Kwee mar Ruoth Nyasaye obed kuome*). Bende odwaro ni jalno moyie mondo owe lamo nyiseche manono chuth.

### **OTE MAR DINDE MANONO.**

Nitiere duol, dinde, paro to gi lony mang'eny ewang' pinyka, ka moro ka moro lieko ni en e din moriere kendo ma adieri. Kuom nyungruokni ere kaka ng'ato nyalo fuono ni to; ere ma adieri to ere ma miriambo, koso gin adiera gin tee? Yoo ma kende ma wanyalo yudo godo duoko ma kare en mana ka wan duto wagolo paro mochido mag lamo nyiseche ma nono, mipuonjo ewang' pinyka gi dinde kaeto waketo pachwa kuom Ruoth Nyasaye achiel kende ma ema nyaka to walam. Jolam nyiseche ma nono oyiere kuom wach achiel:- Ni dhano tee gin nyiseche, kata ji moko ma ideo ewang' pinyka ne gin nyiseche, kata ni bedo ni Nyasaye nitie adier en mana paro morem mar dhano.

Omiyo puonj morem mag jolam nyiseche manono enni Nyasaye inyalo lam kokadho kuom chuechne. Yesu (*kwee mar Ruoth Nyasaye ochopne*) ne oluongoji mondo olam Nyasaye achiel kaeto jogo maluwe sani luongo ji mondo olam Yesu (*kwee mar Ruoth Nyasaye ochopne*) kagiwacho ni ne en Nyasaye.

Buddha ne en jal mane okelo lokruok maduong' ei Jo Wahindi motenore gi ratiro mar dhano e dind Jo Wahindi. Ne ok owacho ni en Nyasaye ma onego lam. Kawuono Jo Wahindi mang'eny man India to gi oko mar India osemye duong' mana kaka Nyasaye kendo gilame. Gisepayo ranyisi mage kendo tara gi tara mag ji lame.

**Ka watiyo gi yoo mar yango Nyasaye achiel kende mowinjore olam gi ratiro, wabiro bedo gi yot kuom lwomo dinde molil malamo chuech, ma wachop kama wamiyoe Ruoth Nyasaye ratiro mare. Ruoth Nyasaye wacho kama:-**

مَا تَعْبُدُونَ مِنْ دُونِهِ إِلَّا أَسْمَاءَ سَمَّيْتُمُوهَا أَنْتُمْ وَآبَاؤُكُمْ مَا أَنْزَلَ اللَّهُ بِهَا مِنْ سُلْطَانٍ إِنْ الْحُكْمُ إِلَّا لِلَّهِ أَمَرَ أَلَّا تَعْبُدُوا إِلَّا إِيَّاهُ ذَلِكَ الدِّينُ الْقَيِّمُ وَلَكِنَّ أَكْثَرَ النَّاسِ لَا يَعْلَمُونَ

**“Ok unee ka mago duto ma ulamo mopogore gi Ruoth Nyasaye gin mana nying ma uthuogo, un gi kwereu machon? Ruoth Nyasaye ne ok ochikou mondo ulamgi. Wuon chike en Allah kende. Ochikou mondo ulame kende maok uriwe gi ng'ato machielo kata sanamu moro. Ma e din moriere to ji mang'eny ok ong'eyo”. Surah Yusuf, wes mar 40:**

**Ji nyalo wacho ni dinde tee puonjo gik mabeyo. Kare en ang'o mochuno mondo waluu achiel kende to wawee mamoko tee? Duoko en ni dinde manono puonjo mibadhi maduong' malich ma en lamo chuech kar mondo gilam Ruoth Nyasaye. Ma en e richo maduong' ma dhano nyalo timo, nekech opogore ahinya gi singruok mar chuech kar chakruok. Dhano ne ochue mondo olam Ruoth Nyasaye achiel kende mana kaka Allah owacho ei Quran :-**

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ

**“ Kendo ne ok achueyo Jinn gi dhano mak mana ni mondo gilama”. Surah Adh-Dhariyat, wes mar 56.**

**Kamano lamo sanamu gi nyiseche manono en e richo maduong' mamiyo Ruoth Nyasaye ok nyal ng'uono ne ng'ato. Ma ok en mana parona. En bura ma Ruoth Nyasaye oseng'ado mana kaka osewacho ei Quran :-**

إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ وَمَنْ يُشْرِكْ بِاللَّهِ فَقَدْ افْتَرَىٰ إِثْمًا عَظِيمًا

**“Chutho Ruoth Nyasaye ok nong'uon ne jalno ma lame kachiel gi nyiseche mamoko, to ong'uonone richo mamoko maok mano kuom ng'amohero. Omiyo ng'at ma olamo nyiseche moko nono mopogore gi Ruoth Nyasaye, osekelo richo maduong' mokadho”. Surah An-Nisa, wes mar 48:**

**Nekech lal mar luwo din manono en lal matamre gi nono, onego bedie ni yango adiera mar din mar adieri mar Nyasaye en gimawinjore maler kendo donjo e paro maonge pek e piny mangima. Eyoo machuok, din mar adier mar Ruoth Nyasaye ok nyal moko mana kamoro achiel ei jomoko e kinde duto maok olandore ewang' piny kaka owinjore. To bende ok donj ei obuongo ni din no keto chike maok ochomore tir gi wat mantie ekind Ruoth Nyasaye to gi chuech mage, kaka batiso kata yie ni dhano adhana nyalo wari gi richoni, kata chopo alam mari ir Ruoth Nyasaye kokadho kuom ng'ato kata malaika moro kaka jowa ma Jo Kristo lieko. Chike moteno Islam ma emomiyo opogore gi dinde duto tee en ni otudore gi yieruok mare ei piny mangima ei oganda manie piny ngima. Eseche ma dhano osefuenyo ni Ruoth Nyasaye en achiel kende kendo chal mare opogore gi chal mar chuechne, ma obolore ne Ruodhe, esehego obedo Ja Islam e dende to gi chunye kendo kotimo mano to oyiene donjo e paradiso kuom ng'uono mar Ruoth Naysaye.**

Jogo modak ei piny iye iye [ e risaf ] kamoro amora ewang' piny ka nyalo bedo Ja Islam, jalup din mar Ruoth Nyasaye ma en Islam kuom kwedo lamo chuech gi sanamu kaeto ochako lamo Ruoth Nyasaye. Onego wang'ee ni mondo ibolri ne dwaro mar Ruoth Nyasaye, ng'ato nyaka bedie ni osiko kapogo ber gi rach mosiko. Dhano osemi nyalo ok mana mar pogo ber gi rach kende, gin nyaka gi nyalo mar yiero mondo otim ber kata mondo otim rach. Nyalogi ok bi nono. Ruoth Nyasaye biro penjo ng'ato ka ng'ato kaka otiyo kodgi . Emomiyo dhano nyaka tem kar monyalo mondo otim ber lilo kendo otem bedo mabor gi richo. Magi duto Ruoth ongeko ei Quran ka owacho kama:-

وَإِذْ أَخَذَ رَبُّكَ مِنْ بَنِي آدَمَ مِنْ ظُهُورِهِمْ ذُرِّيَّتَهُمْ وَأَشْهَدَهُمْ عَلَىٰ أَنفُسِهِمْ أَلَسْتُ بِرَبِّكُمْ قَالُوا بَلَىٰ شَهِدْنَا أَن تَقُولُوا يَوْمَ الْقِيَامَةِ إِنَّا كُنَّا عَنْ هَذَا غَافِلِينَ

“Kendo ka ne Ruodhi ochoko nyithind Adam, mowuok e oguche, nyikwae ma omiyo gisingore gi chunyi giwegi kopenjo ni: Donge an e Ruodhu? Ne giwacho ni: Kamano! Wan joneno ewi wachni.....” Surah Al-Araf, wes mar 172:

Ruoth Nyasaye olero gimomiyo noketo nyikwa Adam (*kwee mar Ruoth Nyasaye ochopne* ) okuong'ore ni en e Ruodhgi madieri kendo moromore olam. Ne owacho ni :-

" Mondo Kik ubi uwach chieng' chier ni: “Wan ne wagalore gi wachni."

Tiende ni ok wabi mako bura chieng' giko ni wan ne ok wang'eyo ni Allah e Ruoth Nyasaye achiel kende mowinjore walam ni onge ng'at mane onyisowa. Ruoth Nyasaye odhi nyime ka wacho ni :-

أَوْ تَقُولُوا إِنَّمَا أَشْرَكَ آبَاؤُنَا مِنْ قَبْلُ وَكُنَّا ذُرِّيَّةً مِّنْ بَعْدِهِمْ أَفَتُهْلِكُنَا بِمَا فَعَلَ  
الْمُبْطِلُونَ

“Kata nekech ka unyalo biro wacho ni: kwerewa emane olamo nyiseche manono kachiel gi Ruoth Nyasaye motelo, to wan mana nyikwayo ma bang'e ok wang'eyo gimoro: koro idwaro tiekowa mana nekech fuwo ma jomokonono emotimo?” **Surah Al-Araf, wes mar 173.**

Ma Emomiyo nyathi ka nyathi inyuolo gi ng'eyo matut mar Ruoth Nyasaye achiel kende to gi dwaro mar lame en kende. Dwaro mar lamo Ruoth Nyasaye achiel kendeni, gi dho Jo Arabu iluongo ni "Fitra"

Jaote Mohamed (*kwee mar Ruoth Nyasaye ochopne*) ne opuonjo ni Ruoth Nyasaye owacho ni: "Ne achueyo jatichna ei din moriere to jochiende omiyo gibayoo ma gilal". Jaote ne owacho kendo ni: "Nyathi ka nyathi inyuolo ka ong'eyo Ruoth Nyasaye (Fitra). Kaeto jonyuolne kete obedo Ja Yahudi kata Ja Kristo kata ja lam mach". Kapoo nono ni nyathino oket tenge mabor gi jii, obiro lamo Ruoth Nyasaye achiel e yore owuon ma en ema ong'eyo. Kata kamano nyithindo luwo gigo ma nitie aluora margi. Koro mana kaka nyathi kao timbe moneno e aluorane ma Ruoth Nyasaye oketo e aluorano, ekaka chunye bende bolore mos ne Ruoth Nyasaye ka ong'eyo ni en e Nyasache kendo Jachuech. To ka jonyuolne okete mondo oluu yoo machielo mopogore, nyathi ok nyal bedo gi paro motegno kata nyalo mar tamore chik ma jonyuolne omiye. Esehégi din ma nyathini luwo en ma oyudo ka jii leeme kendo Ruoth Nyasaye ok nyal kwanone kaka richo ma nyaka ochopi e kidiény moro machielo mar hike kama koro onyalo pogoe ber gi rach. Ka en nyathi ma dichuo to en kama koro oseng'eyo ni en rawuoyi ka obuyo, dwonde bende koro bedo maduong' ekind mamoko. Ka en nyako to kama koro ochako neno malo kendo thunde bende chako chwore. Kanyo koro ichako kwanne richone kendo indiko ber moro amora motimo to gi richo moro amora motimo.



## RANYISI MAG RUOTH NYASAYE.

Kuom ngima ji duto, chakre tin gi nyaka chop kama koro githoe, ranyisi manyiso ni Ruoth Nyasaye en achiel kende mowinjore olam gineno kamoro amora ewang' pinyka kendo ei chunygi giwégi ma nyaka yangre ne gi ni en e Ruoth Nyasaye achiel kende mar adiera. Ruoth Nyasaye wacho ei Quran kama :-

سُنُّرِيهِمْ آيَاتِنَا فِي الْأَفَاقِ وَفِي أَنْفُسِهِمْ حَتَّىٰ يَتَبَيَّنَ لَهُمْ أَنَّهُ الْحَقُّ أَوَلَمْ يَكْفِ بِرَبِّكَ أَنَّهُ عَلَىٰ كُلِّ شَيْءٍ شَهِيدٌ

“Wabiro nyisogi ranyisi magwa kowuok e tunge piny, kendo ei chunygi giwégi ma nyaka yangre ne gi ni en e Ruoth Nyasaye achiel kende mar adiera”. Surah Fussilat, wes mar 53.

Ma en ranyisi kaka Ruoth Nyasaye yango ne ng'ato mondo ong'ee ni sanamu molamono ok en nyasaye mangima. Ei bunge mayudore Amazon e piny mar Brazil, Amerka ma masawa, jo dhot moro ma pod oming' ne ogero abila moro matin mondo gikanie nyasachgi mopaa miluongo ni Skwatch, ma emane nyasachgi maduong ma jachuech. Chieng' moro rawera moro ne odonjo ei abila mondo olam nyasachgino. Eseche mane okulore ne nyasachgino ma bende emane opuonji ni en e ruoth ma jachiwo, guok moti, molil, motimo omboto ne odonjo ei abila. Rawerano ne ong'iyo malo ewang' saa mi oneno ka guogno ong'ao tiende ewi nyasaye kalayo kuome.

Kuom ich wang' gi chuny monjaore rawerano ne oicho guogno gi ng'uech gi rungu ka oriembe oko mar agola. Kane ich wang' mare osekwee, ne ong'iyo matut ma oyudo ni sanamuno ok nyal bedo Ruodh chuech. Ne oparo ni nyaka bedie ni Nyasaye mangima nitiere kamoro nono.

Layo mane guogno olayogo kuom sanamu cha ne en ranyisi maduong' moa ka Nyasaye mangima mondo rawerani oyangi ni mano ok Nyasaye. Ranyisini ne oting'o ote ma kende ne rawerani ni kare olamo Nyasaye ma nono. Mane oware kuom luwo nyiseche manono mane oyudo ka jothurgi lamo. Omiyo rawerano ne oyango adiera kendo ochune ni mondo oyier mar lamo Ruoth Nyasaye achiel kende kata odhi nyime gi lamo nyiseche manono.

Ruoth Nyasaye otalo sigand Janabi Ibrahiim (*kwee mar Ruoth Nyasaye ochopne*) kaka ne omanyong' wang' Ruoth Nyasaye mondo obed ranyisi ne jogo mamanyo yoo moriere tir:

وَكَذَلِكَ نُرِي إِبْرَاهِيمَ مَلَكُوتَ السَّمَاوَاتِ وَالْأَرْضِ وَلِيَكُونَ مِنَ الْمُوقِنِينَ

“Kamano ekaka ne wanyiso Ibrahim piny Ruodh polo gi piny mondo mi obed achiel kuom jogo man gi adieri.” Surah Al-Anaam, wes mar 75.

فَلَمَّا جَنَّ عَلَيْهِ اللَّيْلُ رَأَى الْكَوْكَبَ قَالَ هَذَا رَبِّي فَلَمَّا أَفَلَ قَالَ لَا أُحِبُّ الْآفِلِينَ

“Omiyo kane mudho odonjone, ne oneno sulwe ma owacho ni : Ma e ruodha. To kane sulwe olal to ne owacho ni: ok ahero (Nyasaye) ma lal”. Surah Al-Anaam, wes mar 76.

فَلَمَّا رَأَى الْقَمَرَ بَازِعًا قَالَ هَذَا رَبِّي فَلَمَّا أَفَلَ قَالَ لئن لم يَهْدِنِي رَبِّي لَأَكُونَنَّ مِنَ الْقَوْمِ الضَّالِّينَ

“Kaeto ne oneno ka dwe tuch ma owacho: ma e ruodha koro. Kane opodho to ne owacho: Kapoo nono Ruodha ok otelona to abiro lal ma abed achiel kuom joma olal nono”. Surah Al-Anaam, wes mar 77:

فَلَمَّا رَأَى الشَّمْسَ بَازِعَةً قَالِ هَذَا رَبِّي هَذَا أَكْبَرُ فَلَمَّا أَفَلَتْ قَالَ يَا قَوْمِ إِنِّي  
بَرِيءٌ مِّمَّا تُشْرِكُونَ

“ Kaeto Kane oneno chieng' ka otuch, ne owacho ni: Ma koro e ruodha.  
Ma emaduong' kuomgi tee. To kane opodho ne owacho ni: Jothurwa !  
Akwedora gi gigi ma ulamo kachiel gi Ruoth Nyasaye”. **Surah Al-Anaam,**  
**wes mar 78.**

إِنِّي وَجَّهْتُ وَجْهِيَ لِلَّذِي فَطَرَ السَّمَاوَاتِ وَالْأَرْضَ حَنِيفًا وَمَا أَنَا مِنَ الْمُشْرِكِينَ  
“ Chutho an koro achomora gi Ruoth Nyasaye tir mane ochueyo polo gi  
piny, kendo ok an achiel kuom jolam nyiseche manono”.  
**Surah Al-Anaam, wes mar 79.**

Mana kaka ne owacho motelo, Jooto oseor kuomu, kendo ne oganda  
tee, mondo gijiu yie mar dhano kuom Ruoth Nyasaye to gi dwaro mar  
lame en owuon. Kanyakla gi mago, mondo gisir ranyisi ma Ruoth  
Nyasaye nyiso pile pile. Kata obedo ni ng'eny puonj mag Jootego ne  
onjau gi jogo ma jo mibadhi eigi, mamoko kuom otego osetony kendo  
osekonyo dhano yiero ber gi rach. Teko mar wach Nyasaye mosebedo  
ka tayo dhano kuom ndalo mang'eny, nenore ayanga ei bug chike mar  
Jaote Musa (*kwee mar Ruoth Nyasaye ochopne*) mane opuonjo Jo  
Yahudi kaeto bang'e okaw gi Jo Kristo. Mana kaka ei chike apar mag  
Jaote Musa (*kwee mar Ruoth Nyasaye ochopne*) yudore chike mag bura  
mar nek, kuo, chode mane otigo kendo kawuono itiyogo kuom buche ei  
ogendni moko. Omiyo kaluwore gi ranyisi ma Ruoth Nyasaye oseyango  
ne dhano kuom ndalo duto kachiel gi ote ma osefuenyo ne Jootene,  
oganda jokadhano osemii thuolo mar yiero luwo Ruoth Nyasaye achiel  
kende mar adiera.

Kuom mano chuny ka chuny ibiro penjo ewi ringre owuon kuom yie  
mare kuom Ruoth Nyasaye to gi din mare mar adiera ma en Islam, ma  
tiende ni bolruok enyim Ruoth Nyasaye.

## **MOGIK**

**Duto ma aselero ei andiko ni, nyiso ayanga ni nying din mar Islam owuon ema bende oting'o siro maduong' ma en bolruok enyim Ruoth Nyasaye, kendo onyiso ni nying mar dinni ne ok omany gi dhano. Andiko duto mag Islam nyiso ni Ruoth Nyasaye owuon emane omiyo dinni nyinge. Wasenyiso bende ni Islam kende ema opuonjo dhano chal ma kende mar Ruoth Nyasaye achiel kende kendo opuodho alam mare ma ochikou kaka dhano mondo ulame en owuon kende maok ukadho kuom jomoko kata nyiseche mamoko e kinde. Mogik, bedo ni dhano nigi dwaro mar lamo Ruoth Nyasaye achiel kende ma ochweyego eiye, to gi honni gi ranyisi ma Nyasaye osenyiso dhano kuom kinde duto, nyiso ayanga ni dhano nyalo manyo wang' Nyasaye gi adieri ma yude.**

**Eyo machuok, nying din mar Islam ma en bolruok enyim Ruoth Nyasaye achiel kende, ng'eyo matut mar chal Ruoth Nyasaye to gi bedo machiegni mar oteni gi dhano, miyo ng'ato ang'ata nyalo yie gi Islam ni kamoro amora ei oganda moro amora kuom dhok moro amora, Islam en e din moriere mar Ruoth Nyasaye.**

**Mogik, wakwayo Ruoth Nyasaye mondo oting'wa malo kendo oketwa e yorno moriere ma osetelonwae. kendo wakwaye mondo oguedhwa kendo okechwa, nekech adiera en e Ja kech. Duong' odog ne Allah, Ruodh pinje kendo kwee mare obed kuom Jaotene Mohamed kachiel gi Jootene gi Jonabi mane otelo, kendo ewi jolupgi duto nyaka chieng' giko.**

**.....Amin.....**

May The Almighty Allah grant us the best of these works. It's our Prime Responsibility as Muslims, to spread the message of Islam the world over by any means necessary. I personally as Omar Otieno Al-Bashir, after testifying to the favors and mercies of Allah for His guidance, that led me to Islam in the year 2005, has chosen to spread the word through Writing books, Articles, Public Lectures and Debates both in Kenya and overseas, Propagation of Islam in learning Institutions locally and Internationally, Television and Radio Talk Shows and Feature Programs locally and Internationally, Distribution of Pamphlets and other Islamic literature to both deep Rural Areas and Urban Centers.

It's my humble duty to make it **CRYSTAL CLEAR**, that ALL the books I write and, or translate into Luo language which is my mother tongue, are all for **FREE DISTRIBUTION** and not for sale, unless otherwise specified. I hereby call on each and every willing **DAAWAH PARTNER** to join hands with me in mass production and distribution of these books, DVDs, Pamphlets, T-Shirts and other Daawah materials far and wide. Pick them from any bookstore near you for free and distribute please.

**AMONGST THE MANY WORKS IN OUR LIBRARY ARE:-**



**For more Information, Contact:**

**Sheikh Omar Otieno Al-Bashir**  
**President: Greenfields International**  
**Tel: +254 735 519 520 .**  
**What'sapp, [ +254 702 440 088 ]**  
**Facebook, Telegram: Sheikh Omar**  
**Email: omarbashirshii@yahoo.com**

